

## REGIONAL NEWS BULLETIN

Date – 11/08/2024 Time - 7:30 -7:40Hrs

### HEADLINES (MORNING)

- Chief Minister Pu Lalduhoma'n Assam leh Mizoram ramri chungchang inbiaknaa thutluknaah 'status quo' tih a ni deuh zel chu inremna tak tak thlentü ni lovin a tikhawtlaina mai a nihna chen a awm, a ti.
- India ram zalenna champha vawi 77-na lo thleng tur lawmna puala Zalenna kawngzawha tel tur leh in tina hnam puanzar zar turin Art & Culture Department chuan Mizoram mipuite a sawm.
- Sawrkar laipui Rural Development Minister, Kamlesh Paswan-a'n ram hmasawn zelah hmarchhak state-te dinhmun ngaih pawimawh a ni, a ti.



CM

Chief Minister Pu Lalduhoma'n Mizoram leh Assam ramri ching fel tur chuan hruaitu lute'n inrem duhna tak tak rilru pua hma lak tlan a tul, a ti.

Ramri chungchang sawiarawn zin, Assam Border Protection & Development Minister, Atul Bora-a leh a team te a chenna ina a kawmnaah he thu hi sawiin Chief Minister chuan, ramria harsatna chu an hunlai ngeia chin fel tuma hma lak an duh tih a sawi a. Inbiakna hi vawi tam tak a lo awm tawh thin a, thutlukna hi status quo tih a ni deuh zel a. Hei hi inremna tak tak thlentü nilovin a tikhawtlaina mai a nihna chen a awm, a ti a ni.

An inkawmnaah hian, Inremna neih fel hma chu a khawi lam ve ve mahin ramriah buaina thlen thei harsatna siam loh tha an tih thu te inpawh takin an sawi dun a. Pu Atul Bora-a pawh hian inremna tluantling nei tura inbiakna neih zel chu tha a tih thu sawiin inkawmna hun tha a siamsak avangin Chief Minister hi lawmthu a hrilh a ni.

Chief Minister hi Pu Lalmuanpuia Punte, Adviser to CM chuan a tawiawm a. Pu Atul Bora hi Assam Border Protection & Development official pawimawh Pu Gyanendra Dev Tripathi, Principal Secretary, Pi Prabiti Thaosen, Secretary, Smti Subhalaxmi Deka, Director leh midangten an tawiawm a ni.



HAR GHAR TIRANGA

India ram zalenna champha vawi 77-na lo thleng tur lawmna puala Zalenna kawngzawha tel tur leh in tina hnam puanzar zar turin Art & Culture Department chuan Mizoram mipuite a sawm.

Art & Culture Department Secretary, Pi Florence Zotluangpuii chuan Hnam puanzar chu Art and Culture Office-ah leh hmun hrang hrangah lei theih tura chhawp chhuah a ni dawn, a ti a. District khawpui hrang hrangah DC te kaihhruiin zalenna kawngzawh huaihawt tura ruahman niin zalenna hlutzia leh ropuizia lantir nan chhung tinin Hnam puanzar chu zar vek tur leh Sawrkarin hemi puala hun a buatsaihah tawiawm theuh turin mi tin an sawm tih a sawi bawk.

Art and Culture Secretary sawi danin zalenna puala hnam puanzar nena kawngzawh hi August ni 12-ah neih a ni dawn a, hetah hian zirlai naupang leh mipuiten Aizawl Chanmari leh Sikulpuikawn inkarah kawng zawhin Vanapa Hall kawtah an intawk dawn a; hetah hian zalenna thutiam lak a ni dawn a, a tuk August ni 13-ah mipui a duh apiang te chhim theih turin Tiranga Concert Vanapa Hall-ah

neih tur niin sawrkar pisa leh hmun pawimawhah Hnam Puanzar pawimawhna phochhuah a ni dawn a; hetah hian mipuiten thu an ziah theih tura ruahman niin he thuziak hi August ni 15 Independence Day lawmna pui ber New Delhi-ah tarchhuah tur a ni ang.

<><><>

#### UNION MOS VISIT

Sawrkar laipua Rural Development Minister, Kamlesh Paswan-a chuan ram hmasawn zelah hmarchhak state-te dinhmun chu ngaih pawimawh a ni, a ti a; hmasawna chuan mi hnuaihng ber a thlen theih nan hma an la zel dawn tih a sawi.

Union Minister of State for Rural Development Pu Kamlesh Paswan-a chuan nimin khan zan khat riakin Mizoram a rawn tlawh a. Muallungthu-a PMAY-G hnuai insak tanpuina dawng chhungkua a tlawh hnu-ah Aibawk-ah insak tanpuina dawng te leh sawrkar lam te nen an inkawm a. Union Minister chuan sawrkar laipui hmalakna chu mi tin thleng phak tura duan a ni, a ti a; ram hmasawn zelah hmarchhak state-te pawh an dinhmun ngaih pawimawh a ni tih sawiin kawng hrang hranga hma an sawn theih nan theihtawp an chhuah tih a sawi.

Minister chuan Mizorama inkalpawhna chuan hma sawn zelin hmun kilkhawr tlawhpawh a nih theih nan sawrkarin hma a la zel dawn, a ti a; Mizorama Rêl lo lut tur chuan hmasawna tam tak a thlen dawn tih a sawi bawk.

Union Minister chuan PMAY-G hnuai Mizoram chhunga mi Sing 3 chuanguin tanpuina an dawng thei chu lawmawm a tih thu a sawi a, kalkhawmte chu an harsatna te a hnena thlen zel tura chahin hma a lakpui zel dawn tih a sawi bawk.

Union Minister hi nizan khan Raj Bhavan-ah a riak a, wawinah New Delhi a pan dawn a ni.

<><><>

#### CHAWNGTE JT NGO

Chawngte Joint NGO chuan Chawngte CHC leh Police station-a thawktu leh an mamawh dangte dah belhsak tura an ngenna leh Chawngte khawchhung kawng siam chungchang sorkar hnena an thlen chungchangah duthusam hmalakna an hmuh loh avangin na zawka sorkar nawr ni se, an ti.

Chawngte P Community Service Centre-ah nimin khan Joint Meeting neiin, Chawngte khawtlang mamawh sorkara an thlen chungchang Jt. NGO chuan an ngaihtuah a. Home Department atangin police 8 Chawngte Police Station-ah dah belhsak an ni a, hetih lai hian PWD Minister hnena Chawngte khaw chung kawng chungchang an thlen chu duthusama sorkar atanga hmalakna a awm loh thu leh Health Minister hnena an thlen, Chawngte CHC-a thawktu leh hmanraw dang indaihlohna chungchangah pawh hmalakna duthusam a la awm loh thu tarlan niin, an mamawh an thlen ang te hlawhtlinna, tun thla ni 13 thlenga an la hmuh loh chuan Chawngteah kumin Independence Day chu Boycott ni se, an ti.

Joint NGO Chawngte chuan May thla khan Press conference-ah Mizoram sorkar hnena an khawtlangin an mamawh chi hrang hrang an thlen chungchang leh sorkar hmalakna Aug ni 13 thleng an ngaihchan tur thu an lo sawi tawh a. Chawngte Joint NGO-ah hian Chawngte khuaa NGO lian zual - YMA Branch leh Group, YLA Branch leh Sub Headquarters, CYCA, LDSA, MCSU, MSU, MZP, Central Chakma Mahila Samiti bakah Chawngte P Thalai Pawl te an tel a ni.

(Lalnggheta Ralte Lawngtlai PTC)



LENGPUI AIRPORT

NGO Coordination Committee chuan Mizorama thlawhna tumhmun awmchhun Lengpui Airport chu Indian Air Force (IAF) kuta hlan rem an ti lo tih an sawi.

Mizorama tlawmngai pawl hrang hrang intelkhawm NGO Coornidation Committee hian tunhnaiah Lengpui Airport chu Indian Air Force (IAF) kuta hlan tumna a awm niin an hria tih sawiin IAF kuta hlan rem an ti lo tih an thuchhuahah an tarlang a ni.

Hetihlai hian August ni 5 khan Adviser to CM Pu TBC Lalvenchhunga kaihruai Working Committee on Lengpui Airport chuan an zirchianna report bu Chief Minister Pu Lalduhoma hnenah an hlan a. Working Committee hian India ram hmun danga Airport engemawzat, Airport Authority of India kuta awm mek te an enkawl zui dan te leh private company ten (PPP Mode-a) an kuta awm an enkawl dan an zirchiang a. Mizoram tana hlawk ber tur ngaihtuahin kil hrang hranga khaikhinna neiin Chief Minister hnenah hian report an thehlut a, thuthlukna erawh Chief Minister Pu Lalduhoma kaihruai Council of Ministers meeting kutah a awm a ni.



WCD

Union Minister of Women and Child Development, Annpurna Devi-i hovin State tina Women & Child Development Minister ten nimin khan meeting an nei a. Meeting hi Secretary, Anil Malik Ministry of WCD-in a kaihruai.

He hunah hian Mizoram Minister Pi Lalrinpuii leh WCD Department Officer te chu NIC Video Conference Hall ah an tel ve a. Pi Lalrinpuii chuan Mizoram Women and Child Development hmalakna hrang hrang te a sawi a. Mizoram chu India rama WCD schemes hrang hrangah titha ber pawl a nih dan te tarlangin hmalakna thar hrang hrang an neih tur thu leh theihtawp chhuah zel tum a nih dante a tarlang bawk a ni.



TB ELIMINATION

National Health Mission hnuai National TB Elimination Progamme ( NTEP) chhinchhiah danin nikum 2023 khan TB rinhlelh mi 17,432 test zingah mi 2,013 ten TB an vei a, heng zingah hian zaa 86 enkawl dam niin mi 108-in an thihpui.

Ram puma TB natna umbo beihpui thlakna kal zelah Mizoramah pawh chak taka hmalak a ni a; kum 2025 ral hma ngeia TB natna um bo tumin sawrkarin theihtawp a chhuah a, a tam thei ang ber TB test an nih a, TB vei ten enkawltha zawk an dawn theih nan theihtawp a chhuah a ni.

National Health Mission hnuai National TB Elimination Progamme chuan TB vei an tlem zel theih nan Mizoram hmun hrang hrangah hma a la mek a. District tina damdawi in leh health and wellness centre hrang hrang te thuam chakin TB chu hmuhchhuaha enkawl an nih theih nan thawktu pawh nasa takin a thuam chak a, sawrkar damdawi in, CHC leh PHC-ah te a thlawnin TB a in-test theih bakah TB vei te tan a thlawnin damdawi a sem chhuak bawk.

Sawrkar laipui hmalakna Pradhan Mantri TB Mukta Bharat Abhiyaan hnuai hian sawrkar chuan TB dam lo ten TB natna an vei chhunga an ei leh in tih that nan an bank account-ah thla tin Rs. 500 a pe thin a, heng bakah hian mi inpete nena thawkhoin TB vei enkawl na kawngah hma a la a, TB natna hi India ram atangin 2025 ral hma ngeiin umbo tum a ni a. Sustainable Development Goals 2030 thil tum zul zuiin ram dang tam zawk chuan 2030-ah TB hi umbo an tum a, Mizoramah erawh kum 2025-ah um bo tum niin hmun hrang hrangah mi tam zawk dinhmun hrechianga enkawl an nih theih nan sawrkarin chak takin hma a la mek a ni.

<><><>

#### J&K CIVILIANS KILLED

Jammu and Kashmir-ah firfiakte'n fimkhur lo taka silai an kah vak avangin civil mi pahnih an hliam nia sawi a ni. Nimin, inrinni chawhnu khan South Kashmir Anantnag district-a Gagarmandu area-a Ahlan khua-ah firfiakte leh security force-te inkarah silai hmehpuah a ni a. Defence thuchhuah tarlan danin, hliam tuar civil mite hi an awmna hmun atangin sawnchhuah an ni tawh a, tanpuina pek nghal an ni. Hetihlai hian security forces joint team leh firfiakte inkara buaina hi report a thlen hnuhnun ber thlengin a la in chhonzawm zel a ni.  
News On Air

<><><>